

ZBO

Pais tin sentenares di diferente tarea. E responsabilidat pa ehekushon di e tareanan akí ta serka e poder ehekutivo. Esaki ta gobièrnu sostené pa su aparato atministrativo. Ta mihó enkargá otro hende ku algun di e tareanan akí.

Pa esaki tin yen diferente forma. E forman akí ta varia di independisashon kompletu dor di deshasí di algu (manera den kaso di partinan di transporte públiko) te manehá riba distansia. Un forma konosí di privatisashon ta sosodé dor di inkorporá e tareanan konserní den un kompania anónimo. E ora ei ta keda mantené un tiki konekshon ora ku Pais keda ku e akshonnan. Esaki ta e kaso serka N.V.nan di gobièrnu manera Aqualectra, Curoil, etc. Por inkorporá e tareanan den un fundashon tambe. E ora ei tin mas independensia. Algun ehèmpel ta Stichting Overheidsaccountantsbureau i BAB. Den kaso di independisashon kompletu, gobièrnu tin tiki òf sero responsabilidat (ku eksepsion di ora deshasí di un organisashon!). Den kaso di independisashon parsial tin un sierto grado di involvimentu i responsabilidat.

Hopi biaha no ta pensa sufisientemente riba e magnitud, forma i konsekuensianan di independisashon. E falta di reflekshon delantá akí ta kosta hopi sèn i tempu. I maske depositá tareanan orginalmente atministrativo serka otronan, Pais e ora ei no a skapa kompletamente ainda. E sintimentu di responsabilidat ta keda eksistí mas o ménos, maske ta djis den komunidad. Si e úniko kompania di aviashon lokal ta ku un pia den graf, tur hende ta bira wak gobièrnu pa hasi algu na esaki. Esaki no ta kompletamente lógiko. Un empresa kompletamente privatisá mester por tene su propio karson ariba. Sino aweró nos tur tin ku bai paga pa fayó di algun partido privá. Ora nan hasi ganashi, esakinan no ta bai na medionan general tampoko, tòg?

Un forma frekvente di independisashon ku ta diskutí relativamente poko riba dje ta un ZBO. Un ZBO ta un asina-yamá Organo Atministrativo Independiente. Esaki ta entidatnan ku a duna un forma di responsabilidat i outoridat atministrativo. Nos Banko Sentral ta un ehèmpel di un ZBO asina. SVB, Kámara di Komèrsio i FTAC (nos kachó wardadó ku a funda resientemente kontra kompetensia inhustu) ta ZBOnan. Un ZBO asina, hurídikamente por haña forma di un fundashon, pero por stables'é pa lei tambe. E ora ei, e ZBO ei no ta un N.V. òf fundashon, pero un persona hurídiko puramente pasó lei ta determiná esaki. Un institushon asina no tin statuto. Lei mes ta regla e governance den e lei konserní. Naturalmente esaki por solamente den un grado limitá. E pregunta ta surgi e ora ei kon bo mester anda ku problema ku no a premirá den e lei di institushon. Den tal kaso, bo no por kai bèk sin mas riba e derechi di kompania ku ta reglá den Buki 2 di nos kódigo sivil. T'asina ku esaki ta konta solamente pa personanan hurídiko 'normal'. Ke men, paga tinu ku e ZBOnan ei. Tin un motibu mas pa bo sa unda bo ta bai promé bo subi e kabai di funda un ZBO. Na

Hulanda, e kantidat di kachónan wardadó independisá manera nos FTAC a oumentá enormemente. Awendia tin sigur kuater shen! Den nos Pais tambe ta bin sigur un òf mas aserka tur aña. Mi ta boga pa mantené e kantidat akí limitá. Ta nesario tambe pa fo'i delantá pensa hopi bon riba governance di e entidatnan akí. Hopi biaha ta asigná nan outoridat legal di un manera hopi fásil pa aksentuá nan tarea di supervishon. E ora ei nan tin mag di dreña lugánan, pidi dokumentonan i parti but. Pero ken ta vigilá e ZBO?

Ta bèrdat ku e siudadano ku mester eksperensiá e supervishon tin e posibilidat pa bai un korte atministrativo, pero pa definishon esaki no ta mashá efektivu, pasó semper e ta despues i ku mil detaye i e ta karu. Si e personanan ku, denter di e institushonnan akí, a asigná outoridat atministrativo, no ta realisá sufisientemente ki responsabilidat pisá nan tin òf nan no por dil ku esaki, bo ta hañabo ku bòsh'i problema e ora ei. Tin un peliger tambe mará na arbitrariedat. Tin biaha e aserkamentu ta diferensia fuertemente entre ZBOnan similar. Na Hulanda ta un problema konosí ku tur e dos kachónan wardadó di sektor finansiero, De Nederlandsche Bank i AFM, tin un método di aplikashon kompletamente otro. Esaki ta fèrfelu pa institushonnan, manera banko- i kompanianan di seguro ku a pone bou di supervishon.

Moral di e storia ta ku nos representantenan di pueblo mester averiguá bon pa kada independisashon, kua ta e motibunan tras di esaki i kon e struktura (legal) intenshoná mester ta. Mester tin un filosofia i aserkamentu kla i komprobabel tras di kada intenshon pa independisashon. Sino laga numa, shon!



[Frank Kunneman](#)
VanEps Kunneman VanDoorne
Attorney at law | Partner

T +5999 461 3400 ext. 254
E kunneman@vandoorne.com
